

Psicologo a constata cu e sospechoso no ta responsabel pa su actonan

Tres aña y 6 luna di prison existi pa homber cu a purba viola mucha riba Sero Cristal

ORANJESTAD (AAN) — E sospechoso L. no kier a bisa nada y no kier a contesta ningun pregunta di tanto Hues como Fiscal. El a bisa cu e ta laga tur cos na su abogadonan. Fiscal ta hay'e culpable di a penetra e mucha dia 4 April 2015 y a purba viola e mesun mucha riba 10 di October 2016. Fiscal a tene cuenta cu e raport di e psicologo forense cu ta bisa cu e sospechoso no tin educacion y no ta realiza cu loke el a haci ta malo. E ta haya cu L. no ta responsabel pa su actonan. Fiscal teniendo esey na cuenta a exige 3 aña y 6 luna di prison. Abogadonan mr. Lejuez y mr. Illes a hiba nan defensa y Hues a bisa cu otro luna tin sentencia.

Mirando e interesante debatenan cu tabatin den Corte, DIARIO ta publica e tratamento di e caso y e exigencia di Fiscal den un articulo y e defensa di e abogadonan den un otro articulo. Mester bisa tambe cu abogado mr. Illes a cuestiona e forma con medianan di comunicacion a publica potret y number di e sospechoso siendo cu e no a wordo condena. E ta haya cu medianan di comunicacion a condena y marca e persona aki inhumamente.

ACUSACION

Fiscal a bisa cu e acusacion contra L. ta intento di violacion di un mucha menor di edad riba 10 October 2016. Tambe cu riba 4 April 2015, L. tabatin relacion cu e mesun menor di edad. 4 April 2015 a bay cu e mucha na un lugar y a kita su paña y haci cosnan immoral. Considera esaki Fiscal ta haya cu ta intento violacion y of actonan immoral y a penetra e mucha. Na opinion di Fiscal, dia 10 October 2016, L. a haci mesun cos pero e biaha aki a usa condom y no a penetra e mucha.

Hues a bisa cu mama di e mucha a manda carta pa Hues informa cu e no por ta presente.

INTENTO VIOLA

Hues a muestra cu segun e procesverbaal di Polis, na Sero Cristal Polis tabata patruya y a mira un auto para sospechoso y diripiente a core bay duro. A surgi un persecucion. Na altura di veid di Britania e auto a para.

Agentenan di Polis di biaha



a actua y a mira den e auto patras riba asiento un mucha muher menor di edad. E chofer, e sospechoso L., tabata sin carson y sin paña interior. Door cu e no kier a baha for di e auto a surgi un luchamento, caminda Polis a sak'e for di auto manera e tabata.

Den e auto a haya panty di e mucha (15) y un condom usa. A haya un tas cu pildernan di Viagra y otro pildernan y condom. A haya dos paki di Viagra bashi ariba e asiento di e chofer.

Hues a sigui bisa cu e mucha muher a declara oficialmente, cu ta contra su kier, L. a hib'e Sero Cristal y L. a purba viol'e. El a bisa cu e tabata na veld di futbol y a yama mama pero no a hay'e. E ora ey el a yama L. cu ta colega di trabou di su mama. L. a busk'e y hib'e Sero Cristal. E mucha a bisa cu L. a busca manera viol'e y na dado momento e mucha a mira lus di auto cu a resulta di ta e patruya di Polis. E mucha a bisa cu el a wordo scapa door di Polis.

SOSPECHOSO NO KIER PAPIA

Hues a puntra L. kico a sosode e anochi ey. L. a sacudi cabez y bisa cu e no ta bisa nada y ta laga tur cos pa su abogadonan.

Hues a muestra cu na Polis L. a declara cu e tabatin relacion cu e mama di e mucha. El a bay hiba e mucha veld di futbol. El a bisa cu el a duna dos Venezolano lift y nan a bay Sero Cristal. Na dado momento Polis a yega y el a core bay.

Despues L. a declara na Polis cu e ta bende pildernan y e mucha tabata bende p'e. E mucha lo tabatin cu dun'e

un cierto cantidad di placa pero no a dun'e completo. E mucha a bisa cu un hende tabata debe placa. E hende lo a bis'e ward'e na Sero Cristal. El a bisa cu ta ora cu Polis a gar'e, su carson a kita pasobra su carson no tabata sera bon na su curpa. Pa loke ta e condom, el a bisa cu ta e mucha el a duna pa bende y e mucha a debolbe nan.

MAMA DI MUCHA TAMBE VIOLA

Hues a muestra cu e mama di e mucha a prohibi e mucha di bay cu L. den auto pasobra den pasado caba a purba viola. E mama tambe a bisa cu L. a viol'e pero e tabatin miedo di haci denuncia pasobra L. a menaza di lo mat'e.

E mama a declara cu na 2015 e mucha tabatin 13 aña. E dia ey e mucha a bay cine y mester a yama L. pa busk'e. Na cas e mama a mira cu e yiu a bay baña y L. tabata soda den e cas. Despues di a baña, e mucha a conta su mama tur cos cu L. a haci cun'e y a dun'e 20 dollar ora el a caba. E mucha a muestra e mama e 20 dollar. Segun e mama anterior e mucha a bis'e kico L. tabata haci pero e no a kere. Awor cu e mucha a muestra e placa, el a kere.

E mucha mes a declara cu diferente biaha L. a purba viol'e.

Fiscal a muestra cu si mira celular di L. por mira cu ta L., tabata yama e mucha. Segun L. e mucha tabata bende pilder p'e. El a bisa cu ta duel'e loke el a haci y no lo haci'e mas.

SOSPECHOSO NO RESPONSABEL

Hues a muestra cu tin un raport di un psicologo forense cu

ta muestra cu debi na falta di educacion e sospechoso no ta skirbi ni lesa y no ta pensa riba loke el a haci. E no ta realiza kico ta acceptable. E psicologo a conclui cu e sospechoso no ta responsabel pa su actonan.

EXIGENCIA DI FISCAL

Fiscal a bisa Hues cu dia 10 October 2016, e mucha muher 15 aña ta bisa cu L. a purba viol'e. E mucha a splica cu el a yama L. pasobra e no por haya su mama y kier a bay cas despues di e training di futbol.

Fiscal a muestra cu L. a bisa cu el a bay busca e mucha pasobra e ta bende pildernan y a bay Sero Cristal pasobra hende lo debe placa.

Na opinion di Fiscal, den e caso aki no solamente tin e declaracion di L. contra esun di e mucha sino tin pruebanan di sosten. El a muestra cu Polis a mira e auto para sospechoso na Sero Cristal y a bay pa controla. Diripiente e auto a core bay. A surgi un persecucion y na veld Britania a logra para e auto.

E ora e agentenan di Polis a mira L. sin paña di abou y e mucha muher sinta patras den auto. L. a resisti fuerte contra su detencion. Fiscal a muestra cu L. a bisa cu ta door cu Polis a rank'e na su paña, esaki a kita. Fiscal a bisa Hues cu a bay check e carson y e ta sinta bon bon na curpa y no manera L. ta bisa cu ta kita facil. Fiscal a sigui bisa cu a haya condom den auto y tur esakinan ta cuadra cu declaracion di e mucha.

Di otro banda, L. ta bin cu e storia cu e mucha lo ta bende p'e y e mucha lo a dun'e dos

condom bek. Fiscal a muestra cu e mucha su panty a wordo haya den auto manera e mucha victima a declara. E mucha a bisa cu durante cu e auto tabata core pa Polis, el a logra bisti su carson pero no por a haya su panty. Fiscal ta haya cu e mucha victima, a duna un declaracion consistente kico a sosode compara cu e sospechoso L., cu no a duna un declaracion consistente. Fiscal a bisa Hues cu e no ta kere e storia di L. El a sigui bisa cu e no ta kere cu Polis lo bay inventa cos contra L.

Fiscal a bisa cu e ta haya cu L. a bay cu e mucha na Sero Cristal, a kita e mucha su carson y panty, el a kita su paña y a bisti condom. L. a pone su pianan na pia di e mucha pa e no por move. Na opinion di Fiscal, esey ta muestra claramente cu L. a purba viola e mucha.

Pa loke ta e caso di April 2015, Fiscal a muestra cu e mucha tabatin placa cu L. a dun'e. Na opinion di Fiscal, L. a usa e mesun forma cu el a haci cu e mucha na October 2016. Fiscal ta haya cu e mucha a conta detaya con L. a haci actonan immoral cun'e. Fiscal ta haya cu aki hasta tabatin penetracion.

Fiscal a sigui bisa cu danki na e patruya di Polis cu na October 2016, e sospechoso L. no a logra viola e mucha. Fiscal a muestra cu dos biaha e sospechoso L. a haci mesun cos cu e mucha. Apesar cu e tabata sera 10 dia pa e promer caso, L. a bolbe bay haci e mesun cos cu e mucha.

Fiscal a muestra cu psicologo ta muestra cu L. tin problema mental y no ta responsabel pa su actonan. Fiscal a bisa cu e ta tene cuenta cu esey y tambe cu e caso aki a conmove henter comunidad. E mucha ainda ta afecta y e mucha kier pa L. haya castigo. Fiscal a bisa Hues cu teniendo cuenta cu tur e circunstancianan e ta exige 3 aña y 6 luna di prison, kitando e tempo cu L. ta sera caba for di aña pasa October 2016. Despues di a scucha e defensa di e abogadonan, Hues a bisa cu e ta sera tratamiento di e caso y cu e ta bay studia e caso. Hues a bisa cu dia 16 Februari 2017 pa 8.15 am lo tin sentencia.